



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Outubru 2010

Edisaun : 13 Outubru 2010

JSMP Realiza Treinamentu “Kódigu Penál” ba Estudante EPS Dais no Autoridade Suku Camanasa

Iha loron 7-8 fulan Outubru 2010, Judicial System Monitoring Programme (JSMP) liu husi Unidade Peskizador Juridiku no Unidade Relasun Públiku realiza treinamentu konabá “Kódigu Penál Timór Léste” iha Sub. Distritu Suai, Suku Camanasa no Eskola Pre-Sekundária Públiku Dais Sub. Distritu Maukatar, Distritu Suai.

Direitór ezekutivu JSMP Luis de Oliveira Sampaio *haktuir katak treinamentu ne’e JSMP hala’ó ho objetivu atu Autoridade Suku no Estudante bele hasaé sira nia koñesementu konabá Lei Kódigu Penál Timór Léste ne’ebé regula konabá aktus krime nian, tipu krimi sira, moldura penal, nomós provisauun sira seluk konabá medida penal kuandu ema ida ka grupu ruma komete aktu kriminál, hatene ona nia risku no prosesu sá ida mak nia ka sira atu infrenta.*

Nia mós akresenta liut tan katak lei Kódigu Penál ne’e hanesan lei ne’ebé importante tanba aleinde defini konabá responsabilidade kriminál, Kódigu Penál mós nu’udar instrumentu formal ne’ebé estadu introduz hodi proteze sidadaun sira nia direítu ne’ebé konsagradu iha Konstitusaun no direítu internasional sira seluk.

JSMP hanoin katak importante tebes ba Autoridade Suku no Estudante sira atu hatene no kompriende didiak hodi nune’é sira bele identifika kazu krimi ruma ne’ebé akontese iha sira nia le’et bele prosesu tuir regras formal ne’ebé estabesele ona iha Lei Penal Timór Leste nian.

Durante treinamentu iha fatin rua refere ne’e JSMP nota katak, partisipantes barak mak seidak hatene diak konabá leis sira ne’ebé vigór ona iha Timór Léste liu-liu, lei penál sira ne’ebé durante ne’e estabesele ona hodi regula lala’ok krimi ne’ebé akontese iha rai laran. Tanbá ne’e Autoridade Suku Camanasa no Estudante EPS Dais husu atu autoridade kompetente hanesan Parlamentu Nasionál no Governu liu-liu Ministériu Justisa atu halo sosializasaun ba leis ne’ebé mak estabesele ona. Sira mós kontinua husu ba instituisaun rua ne’e atu halo konsultasaun públiku to’o iha baze ba proposta ka projektu lei sira atu nune’é sira mós bele fo sira nia hanoin ruma molok hetan aprovasaun iha Parlamentu Nasionál no to’o ba promulgasaun husi Prezidente RDTL. Partisipantes sira mós akresenta katak, durante ne’e rona konabá konsultasaun Lei husi Nasionál ba Distritu sira maibé sira rasik nunca hatene no la hasoru autoridades (Parlamentu ka Governu) ne’ebé to’o iha sira nia fatin hodi sosializa lei sá ida deit.

Iha fatin seluk, Direitór Eskola Pre-Sekundária Dais, Sr. Leonito Bere ho laran kontenti hato'ó ba JSMP katak treinamentu hanesan ne'e presiza kontinuasaun tanbá atividade ne'e nu'udar parte husi edukasaun sívika ba estudantes sira atu nune'é estudantes sira hatene konabá leis sira ne'ebé maka vigór ona iha ita nia nasaun. Iha oportunidade ne'e mós sira tatoli tuir ba JSMP konabá sira nia kondisaun eskola ne'ebé to'o agora seidauk hetan renovasaun ka atensaun husi Estadu. Sira mós lamenta katak "to'o agora seidauk iha membru PN ida mak ba to'o fatin ne'e". Sira husu instituisaun kompetente tau matan ba sira nia eskola tanbá to'o agora sira sei uza eskola primária nia fatin (*gedung*), no balun fali sei tur iha uma tali.

JSMP hare katak sá ida mak hato'ó husi autoridade suku no EPS Dais husu hanesan parte importante ba koñesementu sira nian atu hatene konabá leis sira ne'ebé mak tama ona iha vigór no rekomena ba partes relevante katak, presiza iha sosializasaun no fo edukasaun sívika konabá Konstituisaun RDTL, sistema governasaun no Estadu Timór Lésté, papel orgaun soberania sira, no leis sira seluk ne'ebé importante no relevantes ba direitu labarik nune'é estudantes husi nivél Pre-Sekundária to'o Sekundária sira bele hatene ona konabá buat hirak ne'e.

Atu hetan informasaun kompleitu kontaktu:

Luis de Oliveira Sampaio

Direitór Ezekutivu JSMP

Diresaun Email: luis@jsmp.minihub.org

Landline: 3323883